



PETRUSBURG NUUS

Deur God se genade 'n biddende gemeente wat mekaar in liefde dien en uitreik na die wêreld.

1 Augustus 2021

Vanoggend se erediens

Tema: Hoe moet ons God verstaan?

Skriflesing: Job 38 – 42; teks 42:3b: “Ek het oor dinge gepraat wat ek nie begryp het nie: u wonderdade was te groot vir my, ek het dit nie verstaan nie.”

Die kerk is die afgelope maand geruk met onthullings oor sg. besluite van die Algemene Sinode wat 'n mens se hare laat rys. Is dit regtig wat die kerk besluit het? Wat moet ons daarvan maak?

God se gesprek met Job kan ons help om nuut oor Hom te dink, en tot rus te kom.

Só glo ons

Wat glo die NG Kerk nou eintlik?

'n Brief waarin die NG Gemeente Die Strand die rede vir hulle dolering weergee, het die land behoortlik aan die gons. In die brief maak Die Strand sewe stellings wat hulle as besluite van die Algemene Sinode voorhou, soos

- dat God 'n mensgemaakte konsep is;
- dat Satan en die sondeval nie deel van ons geloofsinhoud hoef uit te maak nie;
- dat Jesus se maagdelike geboorte en fisiese opstanding nie geglo hoef te word nie;
- dat Christus se soenverdienste maar net een van vele weë hemel toe is;
- dat die Bybel 'n menslike boek is waarvan ons nie alles hoef te glo nie;
- dat die huwelik nie 'n Goddelike en eksklusiewe instelling is nie en selfdegeslag-verhoudings dieselfde status moet geniet;
- dat elke mens self sy of haar geslag kan bepaal en verander.

Dis 'n verskriklik ontstellende lys van dwalings en 'n mens wil jou hande in die lug gooi dat dié goed in die kerk (en van die kerk) gesê kan word. Dit is waar dat daar NG teoloë is wat hierdie standpunte huldig, maar dis nie die

amptelike standpunt van die kerk nie (met die uitsondering van die besluite oor selfdegeslag-verhoudings).

Dis die kort antwoord. Die langer antwoord is dat die betrokke teoloë wel in ringstugsake oor hierdie afwykende, vrysinnige beskouings aangekla is, maar dat hulle ongelukkig op tegniese punte vrygespreek is. Wat ongelukkig óók waar is, is dat die kerk nie deur amptelike kanale hierdie teoloë gerepudieer het nie, en daarom kan die kerkleiding nie heeltemal van die beskuldigings wegstap nie.

Wat glo ek persoonlik?

Ek wil julle graag verseker dat ek my nie met een van bg. dwalings kan vereenselwig nie. Dit is godslasterlike uitsprake wat nie in die kerk van die Here Jesus hoort nie en die einde van die kerk sal beteken as dit nie daadwerklik en ferm as dwaling afgewys word nie. So wat glo ek?

- *Ek glo in die drie-enige God, Vader, Seun en Heilige Gees. In Hom leef, beweeg en bestaan ek.*
- *Die Vader is die almagtige Skepper wat hemel en aarde in sy wysheid uit niks gemaak het en steeds in stand hou. Hy is ook die Een wat my, sondaar, gekies het om aan Hom te behoort.*
- *Ek glo dat Jesus die Seun van God is wat mens geword het en gebore is uit die maagd Maria, en dat Hy geen biologiese aardse pa gehad het nie. Hoe dit gebeur het, is 'n misterie en die werk van die Heilige Gees.*
- *Ek glo dat Jesus vir my sonde aan die kruis op Golgota gely en gesterf het.*
- *Ek glo dat die Here Jesus op die derde dag liggaamlik opgestaan het uit die dood.*
- *Ek glo dat Hy hemel toe gevaar het, vanwaar Hy aan die regterhand van die Vader die kerk steeds regeer en vir ons intree. Hy is egter deur sy Gees ook in ons midde om ons te lei.*
- *Ek glo dat Hy eendag weer sal kom om die nuwe hemel en nuwe aarde te kom vestig, en dat ek deur sy genade deel daaraan sal hê.*
- *Ek glo dat die Heilige Gees (met die Vader en die Seun) die derde Persoon van die Drie-eenheid is, en dat Hy die geloof in my gewerk het, in my woon en my en die kerk lei.*
- *Ek glo dat die Bybel God se Woord aan ons is, deur die Gees geïnspireer is en my rigsnoer vir die lewe is. Dit is nie 'n menslik uitgedinkte boek met woorde oor God nie, maar 'n goddelike boek waarin God se Woord vir ons opgeteken is.*
- *Ek glo dat ons as kinders van die Here mekaar nodig het en hande moet vat, sodat ons as die Here Jesus se volgelinge saam agter Hom kan aanstap.*

Ek glo ...

- *Ek glo die huwelik is die permanente verbintenis tussen een man en een vrou.*

Toe ek die dag as predikant gelegitimeer is, het ek 'n eed afgelê dat ek my gewete sal laat bind deur ons kerk se belydenisskrifte, omdat dit in ooreenstemming is met die Heilige Skrif. Ek het hierdie binding op my gewete nog nooit as knellend ervaar nie; intendeel, dit is die bril waardeur ek die Skrif beter kan lees en verstaan.

Ds Jaco Thom

Ons Program

Met die verslapping van die inperking tot vlak 3 gaan ons gemeenteprogram so stadigaan weer aan die gang kom. Die kerkdienste begin weer, asook ons wyksbyeenkomste en Sondagskool. Ons sal as lidmate hard moet werk om dinge weer te laat werk, want baie van ons het gewoon geraak aan die gerieflike kerkkyk tuis. Dit is egter so dat ons die gemeenskap van gelowiges nodig het om geestelik sterk te kan staan en te groei. Die kerk het jou nodig! Ons gaan ons steeds streng by die Covid maatreëls hou, met maskers, sosiale afstand en geen handdrukke nie, en ook nog nie verversings nie.

Vandag

- 📎 **Nagmaalsdiens** 9:30 olv ds. Jaco Thom.
- 📎 **Geen Sondagskool** (Nagmaal)
- 📎 **Deuroffer:** Vennootskappe: Lesotho
- 📎 Die Vrouebediening se **dankbaarheidsbotteltjies** kom vandag in.

Dinsdag

- 📎 **Normaalklas** om 18:00 in die konsistorie.

Sondag 8 Augustus

- 📎 **Erediens** 9:30 olv ds. Jaco Thom
- 📎 **Geen Sondagskool** (langnaweek)
- 📎 **Deuroffer:** Middestad- en Arbeidsbediening

Dinsdag 10 Augustus

- 📎 **Kerkraadsvergadering** om 18:00 in die konsistorie

Lief & Leed

Verjaarsdae

Die volgende lidmate verjaar in die week wat voorlê. Baie geluk! Mag dit 'n besondere jaar vir elkeen van julle wees.

Augustus

- 2 Lene van Loggerenberg
- 4 Bokkie Hartzler; **Mina Hugo (92j)**

Huweliksherdenking

- 2 John & Annie Small (66j)
- 2 Barend & Ina de Lange (41j)

Voorbidding

- 📎 Ina Prinsloo – Geval en arm gebreek, herstel by huis na operasie.

Gebedsoproep

Die kerkklok het vir die laaste twee weke elke dag gelui om stil te word en te bid vir die onrus wat Kwazulu Natal en Gauteng geraak het. Voortaan sal die kerkklok weer net elke Woensdag 12:00 gelui word. Ons sal die wyke elke keer inlig waarvoor ons bid daardie dag.

Phillip & Elize sê dankie

Hi Julle, net weer dankie vir jul ondersteuning. Ons het nou reeds net minder as 1200 Bybels in Petrusburg en distrik versprei. Ons deel nog gereeld maandeliks ongeveer 110 nood-kospakkies asook tussen tien en twintig maandpakkies en so 200 enkel etes uit. Ons eer ons Vader vir Sy goedheid en guns. Mooi en veilig bly. Phillip en Elize

Vakature by Ons Woning

Ons Woning het tans 'n vakature vir 'n geregistreerde verpleegkundige. Die aansoeke sluit op 20 Augustus. Kontak asb die hoof, mev Elmarie van der Spuy, by 053 5740 222.



<u>Leraar:</u>	Jaco Thom	084 523 1157	jaco@ngkerkpetrusburg.co.za
<u>Kantoor:</u>	Madette Lombaard	053 574 0279	ngkpetrusburg@gmail.com
<u>Orrelis:</u>	Elmien Thom	084 562 3434	elmien@ngkerkpetrusburg.co.za
<u>Koster:</u>	Annamarie Dercksen	072 499 4262	annamarie.dercksen@yahoo.com
<u>Webwerf</u>	www.ngkerkpetrusburg.co.za		facebook NG Kerk Petrusburg
<u>Kantoorure</u>	Maandae: 11:00-13:00 & Dinsdae – Vrydae: 08:00-13:00		
<u>Bankrekening</u>	ABSA Tjekrekening 2610580001		